

四庫全書

集部

欽定四庫全書

集部

五百家播芳大全文粹卷一百一

詳校官侍郎臣劉躍雲

助教臣常循覆勘

總校官編修臣王燕緒

校對官中書臣范 鏊

謄錄監生臣周 相

欽定四庫全書

五百家播芳大全文粹卷一百一

宋 魏齊賢

葉 茶同輯

祭文

朋舊

祭林三山文

昔我伯父西垣公躬受中原文獻之傳載而之南徘徊

顧瞻未得所付踰嶺入閩而先生與二李伯仲實來一  
見意合遂定師生之分於是嵩洛闕輔諸儒之源流靡  
不講慶歷元祐羣叟之本末靡不咨以廣大為心而陋  
專門之曖昧以踐履為實而刊繁文之枝葉致嚴于辭  
受出處而欲其明白無玷致察乎邪正是非而欲其毫  
髮不差昕夕函丈間無不信信無不行前望聖賢大路  
九軌自詭以必可至三歲一詔士子莫重焉先生方上  
名于春官慨然會合之難而緒業之未竟也亟改轅解

鞅而輟行其視內外重輕可謂審矣里居之良若方  
若陸旁郡之士若胡若劉相與倡和于寂莫之濱韜積  
淳蓄固未有所謂為人意也未幾輝光篤實而不可遏  
州黨推擇居東面之席踵門請至再至三然後抗顏  
臨之長樂之士知鄉大學知尊前輩知宗正論則皆先  
生及二李公之力焉嗚呼西垣公既不及公道之開而  
二李亦皆以布衣終獨先生甫入東觀若將有為而病  
輒隨之中原諸老之規模泯焉不得再白于世其用舍

必有所繫矣嗚呼心迹之判非達者之論區區專信耳目而量君子之用心則亦有大謬不然者先生所遇多忤少合意雖可尋而事不大見中雖無愧而外不及知悠悠斯世識此心者幾何人哉嗚呼先生之臥家左支廢右支緩手不能指授口不能劇談若無與乎世道之升降抑不知百圍之木顛童立枯猶足為丘樊之鎮一旦仆地則意象衰落無復故國之遺矣嗚呼痛哉其未冠綴子弟之末行期待之厚獨出于千百十人之右顧

謫薄安所取此實惟我西垣公之故施及其後人培植  
湔袂閔閔焉如農夫之望歲也齒髮日衰業弗加脩愚  
不自惜大懼先生之功力為虛施每覩然慙惕然恐也  
聞先生之喪念以辭侑奠惜思慮不專條貫靡究筆屢  
下而復泥也既半歲矣而所言乃止于是益至善難名  
至庸無文而迄不能成章也先生之存音問雖踈舉首  
南望猶有虞焉今遽撤其所畏幾何而不為小人之歸  
耶惟當與二三子尊所聞行所知使先生未伸之志猶

有考也尚饗

祭太學同舍文

汪彥章

嗚呼某人命止斯耶以君之年如荷蘭杞菊方欲摧秀而遽樞其芽以君之才如連城玢珞方欲追琢而遽裂于瑕矧君之慈祥豈弟尚友之久而中道奪去其誰不嗟嗚呼哀哉人生世間如沫聚水合散須臾寧有定體虫臂鼠肝均在鑪錘方生方死其樂等爾子返其初何足追企但悲夫北窻之間几席蕭然霜月明空秋風激

天想音容尚存而人則已矣况于家山阻深曼絕千里  
壽親在堂誰繼甘曉室有孺人今則誰恃旅魂孤甕何  
日歸歟興言及此殞淚如洗嗚呼哀哉悠悠百年壽夭  
一終死必有所予今者白馬素車敢替交情于元伯隻  
鷄斗酒聊申哀醜于橋公嗚呼尚享

祭鄒次魏文

孫仲益

嗚呼繫我蠢愚屢屬罪咎白首龍鍾投畀南土交情解  
散莫復瞻顧如避垢汚掉臂而去病臥空山一室環堵

爭席滿前誓不共處之子英妙文中之虎攜書銜袖過  
余逆旅議論蚤出稽今引古西階東序九鼎十鼓翰墨  
之場群獻侯侯引脰一鳴千鈞射鼠我老歸耕十變寒  
暑相望一涯二江之阻被襍囊書獨行踽踽惠然顧  
我漢陰之圃倒衣迎門喜拊欲舞促膝晤言殺鷄炊黍  
訣別幾何俛仰再撫千里計聞方食失筋豈其夢耶而  
遽如許老人無徒吾孰與處子有齋室圖書之府製名  
耘業義取韓愈書來徵銘藥石之補遺墨燦然尚秘箱

笥文成欲致未及子睹捲卷驚呼老淚如雨子今在  
殯寧聞我語庶幾掛劍徐君之墓嗚呼哀哉尚享

祭飛英子文

葉儀鳳

嗚呼飛英命止于斯耶吾不敢怨蒼蒼恨冥冥不生子  
則已既生子形又賦子才奈何子之壽遽止于斯耶子  
以少年豪邁之氣可以貫日月凌青雲蓋將尅日起家  
夫何一跌秋園槐花有恨竟以明月之珠夜光之璧暗  
頓委于風沙嗚呼飛英古來才大難為用志士幽人莫

自公口... 卷一百一  
嘆嗟子安知其終不售乃鬱鬱憤悶一至于斯耶嗟子  
之文妙奪春葩振陽和于筆端筆端之樹皆萌芽嗟子  
之賦飛霜晨露莫能過嗟子之詩池塘春草何以加雲  
山之會萬里圭壁赤城之岩萬丈雲霞惜乎不為封禪  
書不作洛圖頌奈何撐爾腸拄爾腹抱萬卷而為灰耶  
嗟子之筆龍騰虎拏得手應心不模而佳行行春蚓字  
字秋蛇非顏非柳迴然一家不書磨崖碑不寫洛陽  
賦奈何捲銀鈎收鐵畫握雙拳而去耶嗚呼飛英子何

往子雖往而神不沒吾疑天上玉樓成地下脩文闕不  
然紫陽真人銘新宮玉皇上帝頒折札夫何德星降  
此酷罰青帝春風竟十八嗚呼凝爾神駐爾車試為我  
留須臾敢再拜而三奠告汝曰自古到今靡不有終董  
常以弱冠死顏回以壯室歿仲淹悲之深而掩涕宣尼  
哭之慟曰天喪予子以董顏之賢而壽且不及我無孔  
王之德而哀誠有餘嗚呼飛英子何辜傷如我者古未  
有天如此慘酷古亦無此言不必文此意不必據嗚呼

汝知之乎填然鼓聲大昕聚徒蹒蹒躑躑捩衣趨隅當  
此之時子安在情何如月淡管絃風清綺疎銀缸掩映  
琅琅誦書當此之時子安在情何如嗚呼飛英得無怨  
乎天陰雨濕欲一覲子之面可復得乎空街步月欲一  
執子之手可復得乎琴劍縱橫手澤如故嗚呼飛英安  
在去此而死乎子之得疾一切廢置問則詩書惟慮學  
廢吾傷子之賢吾戚子之銳造化之間倘有再生之理  
則必為名卿鉅公而續厥志子之將行子無他說但呼

巖君告以枯竭余聞此語嗚哽咽嗟乎天地之魂消  
山川之氣絕春江鴨綠兮浪千頃春柳鶯黃兮怨萬結  
春風怨兮春花殘吾故人兮千秋永訣痛割腸而欲斷  
酸逼肝而欲裂心寒寸寸灰淚泣滴滴血九泉深處聞  
不聞有恨終天兮飛英此別嗚呼哀哉

祭無旁菴主人

翁元廣

嗟乎無旁乎而已反其真時至便行差不少待兮豈造  
物之不仁頓使玄寂寞英槩沉淪此士友之痛惜鄰里

之悲辛者也至于季行役而未歸

其景文出館潭之帥

訣倚門之

慈親想其易箠之際抱餘恨亡垠嗟乎無旁可奈何顧有生之脩短與斯道之屈伸而固悟之蚤矣豈假詞之諄諄覓今何之言有素徵始請仙宰之號曩之託我者翰墨猶新今果是即歎我未能之于相徒瞻望前塵持此卮酒來哭公靈念眼寒于斯世無復見此偉文尚享

婦女

祭潘賢妃文

葛謙白

惟靈婉嫵淵令淑謹慈和誕發蘭儀刑我宮掖春秋鼎  
盛俄閼瑤光命之弗融盡傷情愫今靈輜慘驚飛旒啟  
途軫痛椒風纏悲總帳寓哀祖饋遣采致儀尚歆寵私安  
此寔窈嗚呼尚享

祭史丞相母夫人文

熊叔雅

惟靈懿範藹乎閭里慶紀緝乎閨門早占夢熊之祥是  
產調鼎之傑踐公槐而擁帥鉞綵服娛親覽帝畿而還

家園板輿佚老固一時之罕並實五福之兼全嗟弗弔  
于上穹嘆莫留于長謝其寔緣自昔守職于茲顧靡逮  
于升堂敢薄陳于奠筭

祭劉樞密母夫人卓氏文

趙德莊

嗚呼公輔之門其華奕奕何以相之風自火出展如夫  
人秉是懿德象服焜煌以宜家國厥初百兩既富以吉  
昌佐于中勲在王室慶積而流前事有述養以大亨名  
冠樞極孰下有年維孝乃秩孰不有初盍觀其卒歲陰

之窮原野蕭瑟胡不吉行丹旒翼翼斯哀斯榮問里動  
色有酒載途肴豆伊苾維我假守縻是簪紱一奠之誠  
以代執紼嗚呼哀哉尚享

祭秦國夫人文

王介甫

於惟夫人順慎和恭上之岐岐寔護于中開號大邦福  
祿之隆康寧壽考而以榮終喪車其行肇此明發上用  
舊德情之鬱結凡我在位最忘心怛奠云將之具此薄  
物嗚呼上享

祭楚國太夫人文

吳元及

嗚呼惟夫人胄出相門早歸名族以忠顯公勲勞之著  
夫人作其配以寶文公昆弟之賢而夫人為之母則夫  
人之淑質懿行不俟稱述蓋可見矣忠顯公以沒身社  
稷而寶文公伯仲高才偉望振于當時惜乎設施未究  
而天不憖遺三數年間珠沉玉折相繼而逝惟夫人享  
封大國富貴康寧猶如一日意其百齡極此五福豈謂  
塵境不留仙馭長筵訃音忽逮聞者驚吁嗚呼哀哉某

等鄉曲晚生韋布賤士異日固稔聞夫人之盛德又嘗  
一登寶文公之門今茲瞻望靈輜不任傷悼輒敢薦其  
菲薄以伸桑梓之誠夫人其鑒之否乎尚享

祭魯國太夫人文

汪彥章

黜日既良寔儀將舉新阡在望旁可置于萬家襄事益  
光後益隆于五鼎辱在分符之地獲陪執紼之賓敢駐  
遣車恭陳祖奠尚享

祭周國太夫人文

司馬溫公

某辱前丞相之深知荷太夫人之懿德趨走門下累紀  
于茲每登堂拜伏或違離在外撫存問遺一均子姓何  
期一旦永不侍前薄具薦誠悲號摧絕嗚呼尚享

祭呂望之母郡太夫人文

王介甫

嗚呼賢矣夫人善持門閭皓若玉雪一其終初允孝維  
婦允仁維姑實生才子我所嘆譽秉義率法困而不渝  
夫人之教著不可誣歸殯窀穸無悔無渝維子之故具  
此俎壺尚享

祭韋氏夫人文

王元之

嗚呼陰偶陽竒天地拘百六之數勞生休死古今同七  
十之期適逢雖闕于冥契扳號實動于孝思凡人有喪  
猶匍匐兮必救無母何恃因劬勞兮孔悲惟靈貞純內  
蘊柔順外馳以上容兮已任蓋令淑兮天資祖德有光  
豕韋與五百之數婦道斯備采蘋列二南之詩在昔羔雁  
成禮室家用宜環珮之音全卽保阿之訓無遺事舅姑  
兮嗃嗃睦親族兮熙熙儼如賓之容式符閭則稱未亡

之日躬脩于母儀仁或親兮我髮必斷鄰或善兮我居  
必移故得花磚啟封煥耀從夫之貴桂枝並折旌酬訓  
子之規或青宮兮替道或墨綬兮撫綏立朝者誨之以  
直道字人者戒之以無私慶高門兮若是躋上壽兮何  
疑嗟人生之無定信天道之難知年來兮霜滿洞庭猶  
思懷橘日兮人迴上國已報焚芝心肝摧兮若剖割涕  
泗亂兮如綆縻冤魄兮已沉蒿里哀號兮莫覩靈輶鐘  
鼎珍羞家廟徒陳于異代封崇典冊泉扃止漏于他

時有富貴兮不能及也念鞠育兮何日忘之顧泣血兮  
罔極諒終天兮已而某欽慕德門交游令子同年幸忝  
于丹墀結綬仍連于百里食而舍肉方健羨于穎封今  
也則亡又同悲于渭水聊薄奠以是陳庶英魂兮降此

祭鄒侍郎母郡太文

陳了翁

鄒公有母海內所知新昭之文夫人安之何以安之命  
之使為行必萬里再竄南陲白首相娛鼓舞聖時此樂  
未饜化為齋咨福不盈眦傷如何其子則也其誰不悲亨困脩

短司此者誰嗚呼夫人亦止于斯

祭楊夫人文

趙承之

於惟夫人有蔚其華胄貴門高文公之家婉誼配德必  
以其倫來嬪田公諫議之孫錫爵封君祿二千石不顯  
惟子官亦朝籍人生實難鮮克耆壽七十之年五福具  
有令終淑使可以無悲惟其懿德歿有餘思嗚呼哀哉  
弱弟不肖獲姻慶門綢繆被愛夙昔承恩天降鞠凶喪我  
先子兄弟惇惇誰恤誰恃如何夫人遽亦辭世嗚呼哀

哉荼蓼之故几筵在堂匍匐而弔心逞形妨恭以牢醴  
致于使人誠因志展哀豈言伸嗚呼尚享

祭李彥思母曾夫人文

曾氏世顯名德相望登爾士女亦藹其芳惟夫人季孟  
之列歸于賢夫仕有奇節式穀似子不殞厥問當官而  
行在黜不愠宜壽其母以慰其子如何夫人而止于此  
我于夫人如予輩行胡寧忍予遽隔泉壤今我之至入  
門失聲涕泣陳詞維以薦誠嗚呼尚享

祭張幾仲母吳夫人文

趙承之

士有一善足以發身閨門之美人莫得聞史所載書竹帛如擲形管之傳蓋不干一如有所譽宜有所試較吾夫人全德之士昔事君子逮及養姑左右色難曰我兒如不第無祿亟喪良人鳴鳩之德四子則均拊嬰搏孤甚愛其季有不順隨却食貶味子祇其教莫我敢遺並官于朝兄弟熙熙伯叔官達既顯于國誨之諄諄不借詞色伯任廷尉人以不寬甚似釋之緊誨則然出纒兵

戎連率方伯綵服于旁其養有赫公家之政預不在衰  
從容平時戒勿生事故伯之將于邊八年鎮靜之澤被  
于幽燕歲時烝嘗昧旦以服婦職之勤執事有肅子孫  
林林拊嬌弄稚如兒之嬉笑語遨戲享兼五福養極萬  
鍾有髮雖白視顏則童衆謂夫人殆且難老庶幾百年  
其壽可保嗚呼奈何而止八十有子華顛孺慕泣血嗚  
呼哀哉昔以軍招遂吏門下夫人顧憐等子姻婭既餞  
漳水獲拜于堂溫溫然其容雖瘠而康齒不期年變故如

此何恃之悲痛若在已嗚呼哀哉凡吏于門莫如我久  
欲知夫人孰出余右銜哀叙詞綴緝毫末酌茲一觴再  
拜永訣嗚呼哀哉尚享

祭滕夫人母楊夫人文

蘓子瞻

嗚呼士盛慶歷如漢武宣用兵西方故西多賢維時滕  
公寔顯于西文武殿邦尹范是齊功名不終有命有義  
我時童子知為公喟四十餘年墓木十圍乃識其子傾  
蓋不疑忠厚且文前人是以秉心平反慈訓則爾仰止

德人如岡如陵升堂而拜猶愧未能豈其微疾一慟末  
已胡不百年以慰其子壽祿在天考終非亡鵲巢之應  
子孫其昌

祭歐陽文忠公夫人文

蘇子瞻

嗚呼文忠之薨十有八年士無所歸散而自賢我是用  
懼日登師門既友諸子八拜夫人望之愀然有穆其言  
簡肅之肅文忠之文雖無老成典刑則成何以嗣之使  
世不忘諸子惟逮好學而剛夫人寔使兄弟吾孫徼福

文忠及我先君出守東南徃違其賢病不能見卒以訃  
聞自斂及塋饋奠莫親匪愧于今有覩昔人寓辭千里  
侑此一樽尚享

祭唐淑人文

朱晦翁

某來會公墓問舍脩容乃聞夫人遽亦覺逝其為駭愕  
良不自勝恭惟夫人克有令德作配君子賓敬齊莊化  
被閨門怡愉肅穆胡不眉壽以承德聲兩殯在堂行道  
悽惻一觴奉奠少見鄙誠敬想淑靈諒垂歆鑒

祭趙淑人文

汪彥章

嗚呼天奪我中饋之良二紀于茲矣墓松乖隔亦復年  
多幸叨榮于朝屢蒙天子恩數褒我賢配命書具存乃  
涓剛辰告于墓下惟靈不昧鑒而受之

祭壽光縣君文

某等得罪神明傾奪茲陰焚然孤露駒犢不知日月有  
期禮當即遠扳號莫及糜潰肺肝不敢滅生以死為殉  
忍羞甘旨如奉晨昏瀝血呼天寃訴何所嗚呼哀哉伏

惟尚享

祭壽光縣君文

嗚呼太丘之孫懿德藹聞相爾攸矣平陽繼殯舅姑不  
逮慕老終身歲時祭享必潔必親采蘋其職法度是循  
鳴鳩其德惟一惟均受錫爾邑從爵爾君篤生令子事  
業青雲義方詒訓遂大厥門榮養踰紀忽反其真令終  
有淑夫復何云牛眠吉卜指日高墳爾酒既旨爾肴伊  
芬臨岐阻奠用表精勤嗚呼尚享

祭李德素縣君文

黃魯直

嗚呼夫人幽閒靜恭來嬪大家肅肅雍雍媿德娠賢為  
世名士人皆願然有子如此惟我息女獲羞蘋蘩夫人  
慈哀教訓拊憐之子于歸我竄蠻貊令我不憂維夫人  
德耆老就養訃音忽傳嗚呼夫人胡不萬年絕域羞奠  
如親酌獻以文代哭靈鑒無遠嗚呼哀哉

祭靖安縣君文

汪彥章

嗚呼余之先人遺息十數事親日長惟余與汝相望卒

歲汝遽余先曾未再稔先人不天嗚呼哀哉天倫云亡  
誰不痛楚今余此遭倍極摧苦雖汝福惠不見缺虧出  
媿高族慶無不宜大邑啟封焜燿宗祜而不永年天獨  
何嗇嗚呼哀哉死如有知從地下遊得侍先子承容薦  
羞顧予纍然越在苦次扳慕無由生孰知死嗚呼哀哉  
人生百年如穴過風况今白首幾不汝從叙訣祖行在  
此卮酒同氣之恩寧復歆否

長老

祭北山元長老文

王介甫

自我壯強與公周旋今皆老矣公棄而先逝孰云遠十方現前饜陳告遣世禮則然尚享

祭園明大師文

黃魯直

謹以北焙龍茗海南水沉時果齋蔬致祭于故園明大師無演公曰嗚呼萬人之傑千人之英向使為儒師友琢磨庸詎不為子雲長卿向使為吏為師為長庸詎不為翁歸張敞雖被佛縛于師有光筆端舌本什公支郎

以檀嚴佛能軒輊不作則已作必駭世文章記問圖畫  
詩人一為多獨能兼之一朝棄家文脫其羈浮江下漢  
訪道求師譬如蒼龍脫其大身留體一髮卷藏自珍逞  
誰出家日用世法作無義語覆不淨業行求正眼還我  
光明作為雷霆以雨四溟方行萬里出門折軸清明粹  
溫今見朽骨歸船雨泣天容岑岑我羞清供如公初心  
尚享

祭臥雲和尚文

僧昆融

噫建炎二年我忽顛怪拈下幘頭褫下腰帶夜盜師庭  
遭師捉敗既亡一物空禮三拜自是退思恨弗少解人  
或稱師道超佛祖量廓滄海我則舉杖擊其頭碎人或  
罵師老不唧噥了無能解我則撫手仰天慶快况師將  
行呼我進几珍重良久奄如棄屣人悲無窮我笑無已  
為甚若此只為從前較些子尚享

五百家播芳大全文粹卷一百一

欽定四庫全書

五百家播芳大全文粹卷一百二

宋 魏齊賢

葉 荼同輯

挽詞

仁宗皇帝挽詞 四首

王介甫

去序三朝聖行崩萬國天憂勤無曠古治洽最長年仁  
育齊高厚哀思罄幅員欲知千載美道德冠遺編

又

憑几微言絕羣臣涕泗揮哀號三級陛縞素九重圍天  
上仙遊遠宮中御座非最悲帷幄侍不復未明衣

又

厭代人間世收神天上遊遽然虛玉座不復望珠旒待  
日移巾幘甕人改膳羞尋常飛白几寂寞暗塵浮

又

同軌羣方至因山十月催永違天日表空有肺肝摧帳

殿流蘇卷鈴歌薤露哀宮中垂曉輒西去不更回

英宗皇帝挽詞 二首

御氣方尊極乘雲已泆寥衣冠萬國會陵寢百神朝夏  
鼎傳歸啟虞羨想見堯誰當授椽筆論德在瓊瑤

又

玉冊上鴻名猶殘懿言蹕聲忽辭千歲祝虛卜五年征羽  
衛悲哀送山陵指顧成謳歌歸聖子世孝在持盈

仁宗皇帝挽詞 五首

司馬溫公

決事神明速任人金石堅天機先兆朕聖度縕淵泉仁  
義生知性恩威獨化權乾坤無毀息長與大名傳

又

聽政涉中昃觀書達夜分周王忘自逸漢祖不知勤  
棣夢因心友雲章落筆文他年納石室光大繼皇墳

又

至德成無象徽名避不居期門弋獵絕步輦宴遊疎餞  
別金缸暗兵嚴武帳虛蓬萊日安仗猶望駕宮車

又

鼇禁叨承詔金華侍執經微生輕草芥聖澤潤滄溟鹿  
性安林野葵心注闕庭堯雲不可望白首涕飄零

又

式道清行馬靈輜下陞簾雲奔同軌集雨泣北民瞻石  
闕蒼烟暝松門白露沾戴弓徒隕絕無計附龍髯

神宗皇帝挽詞

二首

王介甫

將聖由天縱成能與鬼謀聰明初四達雋乂盡旁求一

變前無古三登歲有秋謳歌歸子啟欽念禹功脩

又

城闕宮車轉山林隧路歸蒼梧雲未遠姑射露先晞玉  
暗蛟龍蟄金寒雁鶩飛老臣他日淚湖海想遺衣

徽宗皇帝靈駕發引挽詞

四首

汪彥章

圖治八王上增光六聖餘仁恩漸動植文物揜詩書未  
及金縢啟俄成玉帳虛衣冠歸故國神已在華胥

又

三雍無逸雋四海屢豐年嘉瑞標圖諜休功被管絃鼎  
成龍即去書遠雁空傳多少承平老遙悲杞國天

又

無心居大寶有子傳鴻鈞萬里方終宴千年忽上賓地  
今從禹葬天不返虞巡愴極白皇情處還觀吉仗陳

又

七聖迷途後宮車遂不回乘雲知益遠濡露但增哀日  
卜天寧近山依冰固開千巖應更秀從此是軒臺

高宗皇帝挽詞 五首

御製

草昧千齡旦颺回九縣塵皇天開我宋丹極下真人指  
顧山河定歡呼歷數新斷鼇重立極更與物為春

又

赤伏興王業巍巍四十年佛狸方送死天馬合爭先自  
厭兵車會親提造化權此疆并爾界恩德到淵泉

又

揖遜光堯德重華愧有虞居然將菲質正爾紹皇圖履

燾兼君父文明焰典謨大恩渾未報血淚一時俱

又

不謂神仙窟今時異昔時鼎湖龍去遠柱首鳳來遲顧  
畢三年制驚聞七月期痛心思繼代不忘有聲詩

又

夢斷堯千歲神遊漢五陵洛京元在望禹穴且相承伏  
衛淒烟合笳蕭凍雨凝漫磨千丈石未是頌中興

高宗皇帝挽詞 二首

炎祚開中葉龍翔自有真揮戈回日焰洗甲挽天津立  
極乾坤正循環雨露新嗣皇能繼志詩為武王陳

又

歷數堯咨舜羹牆舜見堯三加徽號冊五日未央朝廟  
祀瞻龍袞韶音遏鳳簫伏蒲思往事淚滿浙江潮

高宗皇帝挽詞

二首

周益公

社稷興中否干戈靜四溟生年同藝祖

皆丁亥

慶壽似慈

寧皆慶八十人意庚庚兆天傾九九齡向來懷夏禹

建炎登嵇山閣

御詩懷哉  
夏禹勤  
今祔越山青

又

大極乾元父清都大帝宮宴酣忘御駿仙去任遺弓音  
過堯仁遠旻號舜孝隆孤臣臺閣舊淚血洒春風

高宗皇帝挽詞

二首

劉叅政

內禪堯咨舜中興夏配天鴻名光寶冊奎畫動星躔靜  
享仁人壽書傳聖政編永言天下養胡不萬斯年

又

南北休兵久仁恩及物深九齡終帝夢四海遺韶音聖  
學高于古衰衣始自今一杯陵上土他日卜高岑

高宗皇帝挽詞二首

蕭挺之

撥亂中興事艱難創業同好生天地德立極帝王功與  
子基圖壯居尊福祿崇一朝違大養悽愴櫟陽宮

又

畫筵排仙仗龍輜去莫攀衣冠藏漢廟弓劍闕橋山宇  
宙精神憐臣民涕泗潛堯階瑩英在無復望慈顏

高宗皇帝挽詞

十首

洪駒伯

寶歷中興業于今六十年  
洗光暘谷日鍊補女媧天  
大業超東漢皇恩暢北燕  
聖謨誰可頌會有筆如椽

又

往在艱難際乾坤震擾中  
京華元有主趙魏剪為崇  
整頓頒神武扶持立雋功  
配天還祀夏真與少康同

又

紫塞連沙漠天親墮香  
藁竟能襄水祐復見養  
慈寧孝

道光千古精神格上靈典謨垂不盡赫赫照丹青

又

禍轉三軍衄天催五鼎烹只知江飲馬豈料觀封鯨士  
感親征詔神扶義戰兵干戈俄載戢遺恨不收京

又

翼善能傳聖巍巍又見堯纒餘知命歲已禪拱宸朝玉  
冊三加峻瓊宮十閤超大章章懿鏢稽古耀宗祧

又

聖學由天縱煌煌翰墨場  
臣中羞瑾靖戶外立鍾王  
飛動鸞窺藻昭回斗避芒  
煥文瞻仰處傑閣在西廂

又

北內神靈地期期億萬年  
巖廊明舜日宇宙戴堯天  
樂事湖山盛英徽雅頌傳  
那知開玉鎖不戀地行仙

又

鶴馭臨丹極龍髯墮玉宸  
爐烟猶泛夜宮蕊已迷春  
夢斷無尋處神遊不見人  
傷心天壤內血淚染車塵

仙仗葳蕤去行行淞水東稽山元禹穴吳岫自堯宮帳  
殿淒寒露茄城起暝風霓旌不可望應在彩毫中

高宗皇帝挽詞

五首

李嶽

建炎恢聖統太上極尊名夏祀參天永堯勲冠古榮艱  
難成帝業付託本皇明俯閱人間世飈遊跨九清

又

壽厯開金筴皇歡奉玉顏難諶天道遠忽愴帝鄉還敷  
德戎夷外安民禮樂間功崇超大禹神穴枕稽山

又

赫奕中興事洪圖久系隆垂裳三紀後脫屣再星終靈  
馭龍騰座仙晨鶴翥空薰琴無世意過密卷悲風

又

漢帝傷心地堯牆夢正勞珠藏起赤水鼎在泣烏號神  
藻光仍煥仁風遠更翔百皇誰比德商廟獨推高

又

映日龍輶動喧天鳳吹休橋仙融路碧梧野結雲愁萬

葉休符衍三年孝制脩臣民瞻祖載慟哭拜江流

高宗皇帝挽詞

五首

陳居仁

力拯艱難運天開聖哲君亦符恢世祚蒼錄炳人文帝  
學窮淵奧宸奎照典墳三宗從著號超軼未前聞

又

天步方寧只民區復晏然心非堯位樂子授舜躬賢揖  
遜高千古恬熙盛萬年乘雲歸帝所溥率淚成川

又

聖略如天大仁心亘古無神兵勝淝水鳴劍罷伊吾宵  
旰逾三紀歌謠遍八區耆龐聽遺誥號絕更嗟呼

又

漢日朝前殿神堯宴大安徒誇一時盛誰似兩空歡謾  
採瀛洲藥猶餘荆鼎丹傷心浙江畔縞仗自回鑿

又

得壽尊慈宸怡神久北宮綵衣頻侍燕寶冊屢垂鴻劍  
落橋山外陵開禹穴東從今壽文母無復玉卮同

高宗皇帝挽詞

三首

林黃中

倉猝扶宗社艱危啟聖神英雄歸駕御狂狡願和親  
汛掃妖氛淨恢張治化新倦勤三紀外頭白盡遺民

又

周漢中興勝唐虞內禪高髀消從馬腹屣脫等鴻毛  
弓劍悲長在羨牆慕慕轉勞龍髯拔莫及四海共呼咷

又

兼愛無南北全能冠古今典墳供夜覽烽火自宵沉  
睿

藻成章煥宸鈞寓意深萬年垂統琬誰識至仁心

高宗皇帝挽詞

二首

謝 諤

炎正中興日真龍應運翔山河重整頓宗社鎮安強付  
託歸明聖優游享壽康自從遺詔下痛泣遍遐荒

又

孝德考千古艱難助有神祐陵崇吉壤長樂奉慈親三  
紀規模遠羣生雨露均只今陶舜治推本感堯仁

高宗皇帝挽詞

二首

黃 謙

火德興王統天威讐獮夷重恢周境土復振漢威儀顯  
號崇瑤冊耆年慶玉卮鼎成龍去遠扳慕不勝悲

又

整頓乾坤後邊烽久已銷和親來北虜溫清樂東朝歷  
數躬傳舜文章煥有堯會稽天仗路傷心綵雲遙

高宗皇帝挽詞

二首

楊廷秀

芒動長星帚親揮却日戈再令天有柱一定海無波黃  
屋非堯樂薰琴付舜歌祇書魏蕩論誄語不須多

又

更造今光武中興昔武丁雲昭河洛畫天作典謨經立  
極餘三紀頤神再一星堯山鄰禹穴松雪蔚爭青

高宗皇帝挽詞

二首

黃倫

大業由身濟中興邁百王憂勤三紀治壽考九齡長棄  
屣遺天下乘雲返帝鄉典謨應不泯奎畫煥堯章

又

湖鼎丹成日中天瑞鶴迎愁雲迷帝幄淚雨洒都城黼

嬰增摧割龍輶忽啟行千官陪素仗九殞欲無聲

高宗皇帝挽詞 二首

袁 樞

雲集燕城擾龍翔漢業興風燃燎衣火雪擁渡河冰險  
難成戡定憂勞付纂成百年遺父老嗚咽望原陵

又

歷數欽堯命謳歌樂舜歸璣衡新日月黼黻舊裳衣姑  
射遊神遠崆峒探道微龍髯攀莫及空悵白雲飛

高宗皇帝挽詞 二首

倪著作

稽古神文煥中興武烈光  
挈圖親授子體道妙為皇萬  
乘隆尊養千齡甫壽康  
龍湖俄趣駕遽返白雲鄉

又

黼黻方徐轉龍輶望已遙  
脊濤平似掌禹穴儼如朝  
喪考群心痛號旻聖孝昭  
稽經崇廟號萬世永尊堯

高宗皇帝挽詞

二首

許拾遺

鰲極恩難報龍髯恨莫扳  
興平三紀內壽考九齡間  
遜德光千古仁心亘八寰  
數周將必復盍看版圖還

又

夷夏均哀涕空同只故仙衣冠趨禹穴雲日慘堯天嗣  
聖昭誠孝通喪振古先小臣思罔極生長中興年

高宗皇帝挽詞

四首

程太昌

先漢運嘗屯今周歷再新必知天地泰為有帝王真立  
極綿三紀垂鴻更萬春鼎龍俄天矯昇鶴肯逡巡

又

英明如藝祖慈厚類仁宗民隱深憂惻天驕入益容前

芳嘗北指鳴鏑自回功戢動皆時當居然八政農

又

智超黃屋表不以位為怡罷省齋居事安持壽殿卮尊  
榮天子父魏煥聖王師盛德幾無古惟堯始濟茲

又

九齡幾協夢三載忽纏喪地下周巡舊山因禹穴傍雲  
卿飛步濶風沛着思長八表神遊處天高罽洛陽

高宗皇帝挽詞

二首

劉寺丞

河濟興王瑞乾坤立極功英雄歸道御仁愛與天同  
脫昇平日琴歌長養風兩宮無少憾一洗漢唐空

又

紫殿鴻儀闡丹青色怡九齡開帝夢四葉茂孫枝  
吳會烏號落中原白髮空鑿輿歸汴日無復未央卮

高宗皇帝挽詞

二首

韓彥質

大厯開真主羣雄控大飛山河千載業天地一戎衣  
復古邊疆定銷兵聖母歸依然興禮樂文武遍郊畿

又

為物聊經世本無黃屋心重明得傳器大業若遺簪典冊褒崇極庭闈孝養深普天歸德報不使二毛侵

又

八秩歸稀有三靈感貝衣鼎湖龍已遠汾水雁空飛羽衛愁無色風雲恠不暉惟餘功與德千古歎巍巍

高宗皇帝挽詞

二首

葉正則

何止超前代功隆道更尊幾同造區夏還復外乾坤黃

屋堯仁度青山禹穴昏遺民猶望幸淚血洒中原

又

河濟初開府江淮晚視師纘戎繇子聖永命獨天知鶴

唳宮虛警雲生仗自移

時厭代之夕都下相傳有儀鷓綠雲之異

上哀何以

稱卒代繼周詩

憲肅皇后挽詞

二首

陳無已

二妃端協帝三后共興周決策天同力收功語不流權  
宜從殺禮末命尚深憂鬱鬱佳城閉終天配壽丘

又

復辟先元約長年捐積憂春衣柏城仗仙去帝鄉游德  
並塗莘敏功臨馬鄧優千秋脩故事車馬戒如流

欽慈皇后挽詞

二首

二祧從孝祀五典載虞嬪顯號追先志陰功見後人承  
顏親不待罔極痛如新未有如椽筆光容可得陳

又

靈岳占佳氣琳宮閔寶衣應祈符寶歷錫號煥皇扉日

月堯同數謳歌啟與歸傷心五雲去不見六龍飛

隆祐皇太后挽詞

五首

汪彥章

四紀歸坤極三朝賴母臨德齊先后懿恩及聖君深冊  
寶追崇祀衰麻欲報心哀榮千古事誰復嗣徽音

又

慶源由魏國奉事及宣仁盛德儀中壺私恩絕外親長  
秋應不老厚夜忽無塵來歲柔桑綠誰臨蘭館春

又

朔漢遐征後南州倣擾時人心憂社稷天意屬廉帷擁  
祐千齡主圖回萬世基中興能事畢儵與帝鄉期

又

化行江漢域人喜翟車還色養方無阻神游遽莫扳月  
沉長樂殿雲繞慶都山不奉旋京駕千秋慘聖顏

又

德盛周文母儀尊譽正妃山河隳地載星宿掩軒暉此  
日哀笳曲他年大練衣越岡寧久駐會有灞陵歸

太皇太后挽詞

二首

王介甫

國賴姜任盛門歸馬鄧高闕睢求窈窕卷耳念勤勞聖  
淑才難擬休明運繼遭岡原今獻卜維宸正扳號

又

塗山女德茂京室母才難具美多前志餘光永後觀遺  
衣遷館御祖載出宮敢終始神孫孝長留萬國歡

大行皇太后挽詞

二首


陳無已

德名三后並母道兩朝尊勇決高千古危疑定一言先

期還政事隆禮改山園哀挽西郊道雲愁晝亦昏

又

扶日行黃道乘雲上紫微憂勞形末命恭儉見陳衣布  
德開刑網和戎戢武威要知懷惠處行路涕交揮



五百家播芳大全文粹卷一百二

欽定四庫全書

集部

五百家播芳大全文粹卷一百

五  
二  
至

詳校官侍郎臣劉躍雲

助教臣常循覆勘

總校官編修臣王燕緒

校對官中書臣范 鏊

謄錄監生臣秦 英

欽定四庫全書

五百家播芳大全文粹卷一百三

宋 魏齊賢

葉 棻同輯

挽詞

韓忠獻挽詞二首

王介甫

心期自與衆人殊骨相知非淺丈夫獨幹斗杓環帝座  
親扶日轂上天衢鋤耨萬里山無盜袞繡三朝國有儒

爽氣忽隨秋露盡漫憑陳迹在龜趺

兩朝身與國安危典策哀榮此一時木稼曾聞達官怕  
山頽果見哲人萎英姿爽氣歸圖畫茂德元勲在鼎彝  
幕府少年今白髮傷心無路送靈輶

晏元獻挽詞

三首

王介甫

文章晉康樂經術漢公孫舊秩凝丞貴前功保傳尊傳  
呼猶在耳會哭已填門蕭瑟城南路鳴笳上九原

又

終賈年方妙蕭曹地已親優游太平日密勿老成人抗  
論辭多秘賡歌迹已陳功名千載下不負漢庭臣

又

感會真竒遇飛揚獨妙齡他年西餞日此夜上騎星宿  
惠留藩屏餘忠在禁庭音容無處所髣髴寄丹青

司馬文正公挽詞

四首

元祐開皇極功歸用老成惟深萬物表不令四時行日  
者傾三接天乎奠兩楹堂堂寧復有理玉慟佳城

又

國在多艱日人如大雅詩忠清居沒世孝友是生知加  
璧延諸老橐弓撫四夷公身與公德同作太平基

又

獻納無虛日居然迹已陳清班區玉石寶歷順星辰更  
化思鳴鴈遺書似獲麟易名無異論今代兩三人

又

毀譽蓋棺了於今名益尊哀榮有王命終始著民言蟬

冕三公府深衣獨樂園平生兩無累憂國愛元元

司馬溫公挽詞 三首

陳無已

恭默思良弼詩書正百工事多違謝傳天遽奪楊公一  
代風流盡三師禮數崇若無天下議惡美并成空

又

百姓歸周老三年待魯儒世方隨日化身已要人扶玉  
几雖來晚明堂訖投圖心知死諸葛終不羨曹蜎

又

少學真成已中年托著書輟耕扶日月起廢極吹噓得  
志寧論晚成功不願餘一為天下慚不敢愛吾廬

范忠文公挽詞二首

黃魯直

信道雖當爾知人乃獨亨書林身老大諫紙字歌傾  
去三山動人危五鼎烹保全天子聖几杖送餘生

又

公在昭陵日文章近赤墀空嗟伏生老不待邇英惟去  
國幾三虎聞韶待一變誰言益棺了新樂銷蛛絲

韓獻肅公挽詞 三首

鬱鬱高陽里生才世不孤  
八龍歸月旦三鳳繼天衢  
梁壤吾安仰人亡道固臞  
空令湖海士愁絕奠生芻

又

物產元希世風流更折衝  
決疑京兆尹富國大司農  
遠業終三事仁聲達九重  
方祈酌周斗何意輟秦春

又

淚盡才難日斯人遽隕傾  
冰枝憂木稼食昴恨長庚  
名

與具茨重心如潁水清堂堂萬夫表直作閉佳城

王文恭公挽詞 二首

先皇憑玉几末命寄元勳  
賓日行黃道扳髯上白雲  
四時成歲律五色補天文  
不謂堂堂去今為馬鬣墳

又

宥密深黃閣光輝極上台  
藏舟移夜壑華屋落泉臺  
兩緋誰為挽寒笳故作哀  
傷心具瞻地無復袞衣來

賈魏公挽詞 二首

王介甫

功名烜赫在三朝經術從容輔漢條儒術早紆丞相紱  
戎冠再挿侍中貂開倉六塔流民復出甲甘陵叛黨銷  
東第祇今空畫像當時於此識風標

銘旌蕭颯九秋風薤露悲歌落月中華屋幾人思賈傅  
佳城今日閉滕公名垂竹帛書勲在神寄丹青審象同  
天上貂蟬曾夢賜歸魂應佩紫陽宮

吳正肅公挽詞

三首

昔繼吳公治今從子產游里門無舊客鄉國有新丘謀

讓裨謀遠文歸賈誼優此時辜怨寵西望涕空流

又

從容邊塞議慷慨廟堂爭曲突非無驗方穿有不行朝  
廷終倚賴贈襪極哀榮豈愧公孫相平生學董生

又

應世文章手宜民政事才朝多側目忌士有拊心哀書  
蠹平生簡香寒後夜灰悠悠國西路空得葬車回

吳丞相挽詞

丙魏雖遭漢道昌豈如公出值虞唐秀鍾舊國山川氣  
榮附中天日月光更化事功參虎變贊元時序得金穰  
傷心鼓吹城南陌回首新阡栢一行

南豐先生挽詞

二首

陳無已

早棄人間事真從地下游丘原無起日江漢有東流身  
世從違裏功名取次休不應須禮樂始作後程仇

又

精爽回長夜衣冠出廣廷勲庸留琬琰形像付丹青道

散餘篇翰人亡更典刑  
侯芭才一足白首太玄經

何郡王挽詞 二首

汪彥章

兩紀中天侍冕旒  
甘盤仍作濟川舟  
傳家經術終黃閣  
袖手功名未白頭  
身似留侯初出漢  
葬如姬旦不忘周  
千官祖奠城東陌  
十里春風鼓吹憂

名標南國洞中天  
曹出西京鼎足賢  
早扈六蜚依日月  
晚辭三事作神仙  
馬蹄忽到滕公室  
雞夢那逢謝傅年  
一品真王封異姓  
功臣今日數凌煙

樞密周府君挽詞

少日聲名冠兩科，升星爭看切雲戈。  
回翔禁路聯三組，獨步樞庭擁萬戈。  
飲馬直須臨瀚海，洗兵端欲挽天河。  
壯懷落落今休矣，急景駸駸可奈何。  
蟻動忽聽床下鬪，駒跳已向隙中過。  
衆原一閉成千古，有客哀吟只浩歌。

參政謝公挽詞

二首

黃定

落落明良會，千齡際遇難。  
雞香初坐帳，獬豸即裁冠。  
自抗囊封疏，長開黼座顏。  
西樞東府事，施設未全殫。

又

一自參機政居然重本兵才優文與武謚重敏兼榮行  
矣躋三府天乎夢兩楹都陽當自識端的付唐生

簽樞胡公挽詞 三首

孫仲益

潤色文章手掄材政事科補天媧后石却日魯侯戈已  
向蒼生望那聞挽者歌堂堂無復有寂寞闕山河

又

虎穴連三輔狼煙暗百蠻邊風搖馬鬣翔雪點袍斑委

命輕於縞收名重若山遺忠應未泯結草在兵間

又

名字標仙籍真遊返帝閨一尊無復日百卉自爭春井  
廢無沉轄車懸有吐茵空餘峴山刻千載尚光新

宣撫簽樞胡公挽詞二首

幕府分弓日轅門叱馭時捫星高歷井修月上騎箕發  
面降胡泣聞輦聖主思龍驤老賓客兢賦八哀詩

又

交親二紀餘貧病故人疏落落辰參似寥寥楚越如空  
勞三夜夢不辨一行書尚記喬公約垂淚滿過車

樞密劉公挽詞

三首

朱元晦

天界經綸業家傳忠義心謀謨憂國遠勲烈到人深廊  
廟風雲斷江湖歲月侵一朝成殄瘁九牧共沾襟

又

談笑平蠻策焦勞振廩功復讎非宿志忍死罄餘忠人  
嘆百身贖天悲一鑑空九原終莫起千載自英風

又

久矣身無用前思嘆莫償  
豈期今老大復此重悲傷  
淚向遺書盡心隨宿草荒  
諸君那不死慟絕鬢成霜

大資政張公挽詞

三首

孫仲益

大筆文章手飛揚  
獨妙年判花森玉筍  
視艸對金蓮講  
肆聯重席宮花卧  
八埽他年紬石室  
妙絕冠遺編

又

禮絕迂三顧  
恩榮閱九遷  
秉鈞平似砥  
履坦直如弦  
晉

室和戎日周家定鼎年  
金甌方卜相颺馭已超然

又

輦路追高躅聯翩接兩駟  
猶蟠倚天劍尚艤濟川舟  
元帥俄分閫羈臣亦首丘  
一杯相屬地回首涕交流

禮部尚書洪公挽詞

三首

葛謙白

沙場握節仗時髦說古縱橫小  
六弢委質肯輕從晉鼓  
攜文空見泣秦牢冷山韻語明如斗  
蓮濼危言命若毛  
豈料歸期纔十稔白楊聲裏壽原高

守節冰天十五霜歸來飛語又炎方正欣射鴈還幽窖  
旋復飛鳶墮瘴鄉位不當材僅喉舌壽難酌德遽膏肓  
八龍共侈荀門慶雖厄龍蛇殆不亡

高材博識服簪紳玉樹瑤林絕點塵氏族源流推肉譜  
春秋褒貶藉調人膝間韻磬傳仙水枰上枯碁戰楚秦  
妙處不傳今已矣遙瞻遺像淚霑巾

樞相太傅信安王挽詞 二首

孫仲益

台路巖瞻峻戎藩閭寄雄九章公袞貴六韋將牙崇翊

運三階正持危一棟隆帝閑龍化後冀北已成空

又

大號疎廷煥中權秉帝樞槐庭聯上宰芸省冠諸儒國  
瑞麟一角家肥鳳九雛便乘箕尾去彷彿在星圖

又

秉燭聯飛蓋分茵託後車兵厨千日酒記室五雲書尚  
想儀型在那聞語笑餘龍鍾隨葬紼老淚滿衣裾

少保張公挽詞 三首

帝聞謀元帥齋壇屬老儒黃麻乎大號阜轟擁前驅便  
合聯華袞猶應冠紫樞炎炎白晝日奄忽下桑榆

又

平土疏新渥覃恩洞九泉印懸金斗大冠珥玉蟬聯墜  
劍今亡矣鳴珂尚宛然風流春月柳無復似當年

又

並轡天街裏聯裾省戶中追參兩班合醉笑一尊同我  
老猶占鵬公豪正吐虹忽騎箕尾去淒斷白頭翁

大卿范公挽詞

藉甚金閨彥從容玉帳籌  
垂堂懲後戒徙突慕前修  
忽作隋珠彈直成趙璧投  
寧辭廣武械竟脫楚儀囚  
蹇叔言猶在散函骨未收  
云何即長夜不復見焚舟

起居方舍人挽詞 二首

汪彥章

漢殿傳臚處回頭四十春  
共嗟香案吏歸作釣臺人意  
氣林泉老聲名日月新  
賈生方擬召鵬鳥在承塵

又

經術群公上人材二紀間屢持膚使節竟老近臣班賜  
第叨同擢趨朝憶共還白頭無力送能隔幾青山

強主客挽詞 二首

不解低眉強取通平生進退古人風三年省戶享塗左  
千里家山使節東從白得紅天意速看朱成碧世情空  
迹疎似我猶推挽忠厚今誰肯繼公

早服公名願負墻晚方緣契預升堂枯荄豈足煩餘潤  
畢景長期附末光始報繡衣持使節俄驚丹旆倚歸艎

自憐多難空銜德千里無從酌一觴

張徽猷挽詞二首

家有平津舊學傳人材嘉祐至和前運籌慣倚將軍樹  
畫諾頻分刺史天字得鍾王真楷法心超棗可祖師禪  
零陵宴寢公重到父老追思靜治年

天與精忠伯仲間功成公獨拂衣間專城早應賢侯選  
延閣榮聯近侍班去國輕遺龍虎道思鄉長夢鹿頭關  
笑談平日摠衣處學子相逢淚雨潛

杜侍郎挽詞

三首

陳無己

美政真吾母名家更杜陵  
于張從昔少魯衛至今稱  
絲竹中年好詞華夙世能  
周南棠棣傳平世幾人登

又

驥駟方懷遠松筠忽有秋  
雍容名士數終始法家流  
凜凜驚千載堂堂閱一丘  
能令羊季子不肯過西州

又

身去風流在人難玉石分  
平生纔一見治行已多聞  
更

覺知音少還脩地下文他年九原淚仍是兩馮君

王察院挽詞

二首

陳無已

施報終何在窮通共一空兩言成益友百代仰高風終始無遺恨恩榮託至公不應埋直氣會見吐長虹

又

良貴官何與長年死不亡身須禦魑魅氣已懾豺狼不盡胸中蘊猶堪地下郎豈惟吾道慶編簡亦輝光

寶文李公挽詞

三首

孫仲益

十道觀風使三朝屬老成  
理輪豺虎避檄水鱷魚驚  
閣徵書入連城負弩迎哀吟  
追往事空復故人情

又

絳雪飛丹鼎蒼雲覆茗杯  
聊從五禽戲空使萬牛回  
拄笏看山坐乘桴跨海來  
仙游知有在名字記丹臺

又

五紀周旋地欣同七十稀  
長庚陪月曉孤鷺伴霞飛  
忽作三休去真成一夢非  
不知華表上白鶴幾時歸

周待制挽詞 二首

平生器業負經綸誰謂公才不東鈞  
讜論十年持紫橐仁聲三郡駕朱輪  
龜文豈是背無甲駒隙俄驚歲在辰  
宅浹清漳親義重佳城引脰涕沾巾

手開榛棘啟雲扃淳古胸懷到大庭  
坐脫老龐那問日自銘小社不占星  
牛頭吉兆空形夢馬鬣新封遽妥靈  
警欵從今成永訣欲占遺像只丹青

洪慶善郎中挽詞 四首

登名蟾窟值休辰中外掀騰寵數頻錦帳握蘭紫帝所  
繡衣持斧耀江濱兩州名社施張在四水門墻卜築新  
豈料生還杳無日塚邊惟卧石麒麟

筆下翩翩注九河腹中空洞五車多麟經旨妙傳洙泗

公嘗為春秋  
解士人傳誦

騷學詞明慰汨羅

公注楚詞  
行於世

六度有為超

梵業一心無累證禪那龍蛇歲惡賢人逝心折風前薤  
露歌

平生氣槩凜冰霜聖讀潛心德愈光賞善每能頻擊節

避人寧復解移床第知中壘序論語誰測詩仙流夜郎  
有道固應黃髮壽何期竟不驗長桑

閣茂之年拜伏犀雞豚同社記金溪情深縞紵論交契  
義切蓬麻荷品題花底醉春同挈榼雲中歷妙共扶藜  
豈知生死今殊路技淚佳城意慘悽

吏部張公挽詞

孫仲益

千騎森森擁戟牙鈴齋高卧放朝衙官曹已踐文章省  
門闕猶傳處士家天上麒麟新活計壁間蝌蚪舊生涯

一炊未熟成今古零落空懸刺史車



五百家播芳大全文粹卷一百三

欽定四庫全書

五百家播芳大全文粹卷一百四

宋 魏齊賢

葉 榮同輯

挽詞

叔父給事挽詞 十首

黃魯直

元祐宗臣考十科公居八九未為多功名身後無瑕點  
孝友生知不琢磨

平生治獄有陰功，忠孝臨民父母同。  
贛上樵夫談卓令，宣城老吏識于公。

三晉山河數十州，頻年水旱不能秋。  
我公出把司農節，粟麥還于地上流。

更生若訟石中書，宰掾非人欲引裾。  
兩帥弄兵幾敗國，同時御史更誰如。

曾發公家鉅萬錢，溝中襁褓却生全。  
三齊水後皆禾稼，不殺耕牛更可傳。

軍容百萬轉風雷  
獨料王師不戰推  
三篋飛書公對獄  
元豐天子照姦回

隴上千山漢節回  
掃除民賊不為灾  
蜀茶總入諸蕃市  
胡馬常從萬里來

廊廟從來不在邊  
黃扉青瑣慶登賢  
除書未試回天筆  
何意佳城到馬前

榮祿常思澤九宗  
山摧梁壞併成空  
百年遺恨誰昭洗  
他日諸郎有父風

晉地無戎卧賊曹民兵賜笏解弓刀六年講武儒冠在  
不踏金門着戰袍

工部鄭公挽詞

王介甫

地蟠江漢久知靈通德門中見老成南去伏波推將略  
北來光祿擅詩名密章贈襪連三組畫筭喪車載一旌  
陰德故應多後福可能生子但升卿

給事同年馬公挽詞

二首

王介甫

慶歷公偕起元豐我獨傷兩楹終昔夢五鼎繼前喪薰

歌曾攀桂甘留所憩棠素風知不墜能世有諸郎

又

藏室亡三篋得之公最多露晞當晚景川逝作前波惠  
寄與人誦悲傳挽者歌竹西攜手處清淚邈山河

舍人崔公挽詞 二首

黃泰之

昭代培英俊皇天獨不仁儒林埋鸞鷲翰苑失麒麟青  
史空遺字黃麻半掩塵惟餘忠蓋語公付義方人

又

昔會錢同舍欽聞玉潤姿公時尚縈服我亦去持麾再  
起風斯下重來霧怯披方圖問竒字投淚賦哀詞

侍郎李公挽詞

二首

昭代論人物如公實罕儔行藏無一愧才業兩俱優矜  
式新韋布封章動冕旒持荷簪筆地猶想舊風流

又

吏績今無匹邦人合去思築堤防水患振廩粒民饑歷  
歷新安戒洋洋近古詩經綸曾未究空有典刑遺

尚書洪公挽詞 三首

闕

人厄孤忠賴主知平生麟閣像深負禹門思

某往歲嘗

拜公畫像於錢塘間道所送也

又

碧落開何晚蒼生望每虛九原飛旒日諸老賜環初雨  
露深黃壤風霜入素車向來端歷歷異代可無書

又

萬古勲名遠，長江日夜流。  
賈生聊屬國，杜預本春秋。  
天上騎箕尾，人間笑鶯鳩。  
一經知好在，袞袞看公侯。

光祿董公挽詞

二首

孫仲益

舊學江都相，遺忠太史家。  
絳帷今寂寞，青簡尚光華。  
漫奏三千牘，猶傳四十車。  
諸生半齊魯，東望涕橫斜。

又

帳殿旌旗卷，轅門鼓角悲。  
江邊五馬渡，天上六龍飛。  
感憤冠衝髮，追扳肘見衣。  
興元戲難日，零落寸心違。

學士蔣公母挽詞 三首

汪彥章

舉酒頻華族高堂有白頭生兒勝武子偕老得黔婁未  
免平反笑俄驚孺慕憂他年如輟社牛女有悲秋

又

坐膝扶床處人看七十稀孤雛方反哺雙劍忽隨飛脂

澤新封

闕

又

才大驚餘子名高壓四夷鴈書希世事鵬賦暮年悲習

險從人在杯圈舊事非淒涼嘉樹側無復板輿歸

端明汪公挽詞二首

呂伯恭

異時憂世士嘆息恨才難每見公身健猶令我意寬彫  
零竟何及回復豈無端此理終難解天風大隧寒

又

四海膺門峻親承二紀中論交從父祖受教自兒童山  
岳千尋上江湖萬折東微言藏肺腑欲吐與誰同

魏國錄挽詞二首

麻衣見天子拜疏不知休落落山林氣拳拳畎畝憂極  
知千載遇政用一身酬繞舍聞溪水朝宗日夜流

又

群公祖疏傳多士送陽城短棹非前約長亭及此行深  
留移白日共語只蒼生會續山陽賦鄰人笛未橫

祭酒蕭公挽詞

摩揣誠斯薄雕鎬質自銷平生但真樸直上絕枝條氛  
霧終澄霽丘山亦動搖朝陽舊時鳳聲入舞簫韶

郎中楊公挽詞二首

象魏三千法瀛洲十八人  
南宮占列宿少海近重輪  
閒道清羸極猶能職業親  
榴皮餘屋壑零落獨無神

又

並舍游從舊同朝分義深  
時時墜書札得得到山林  
北去先移棹南來後盍簪  
死生離合地搔首一悲吟

王啓事挽詞二首

諸老收聲盡佳城又到公  
蒼天那可問吾道竟成窮  
旌

卷甫田雨簫橫雪浦風今年襟上淚三哭萬夫雄

又

太史交旃日元戎解甲秋先鳴驚衆寐孤憤壓群咻羽  
翼新鴻鵠聲華舊斗牛斷橋無恙不落月照寒流

周尚書挽詞

奏篇曾用牘三千晚歲回翔日月邊眼看四朝諸老盡  
身兼五福幾人全清臺課歷遺書在晝寢凝香舊政傳  
竹馬館前寒月白當時轍迹故依然

許著作挽詞

清文麗藻百川增  
窘步追隨愧不能  
麟趾差肩臺岌岌  
鴈飛聯翼塔層層  
尊鱸歸興都門酒  
薤露悲歌大隧燈  
獨向梁間誦遺句  
寒松衰菊繞峻嶒

運使郎中張公挽詞

三首

孫仲益

忽作霜松折猶殘  
舊桂叢仙山芸閣冷  
郎署粉闈空節蕩  
函金虎車旛掩畫  
熊淒涼追往事忍看  
一旌紅

又

門表尚魏昂尊名擅一坊珂鳴非故里星聚有新堂月  
暗烏衣夜風高鴈折行吾生如寄耳端是橘中藏

又

學省周旋地三朝四紀中同聽對床雨共詠舞雩風少  
日偕千佛殘年獨兩翁那知有存歿老淚落新宮

提刑直閣張公挽詞 二首

荷插酬身後騎箕返帝旁風纏卿月暈雲掩使星光炯  
炯三珠在冥冥一鑑亡故交今白髮掩袂涕淋浪

又

撫事空心折懷新尚目存壽康駢五福德爵擅三尊蠹  
落芸籤冷蛛懸畫戟昏像圖猶彷彿漫記刻舟痕

提刑郎中范公挽詞

星輅出帝躔光射斗牛邊納陛傾三接埋輪聳十連那  
知憂鵬日已復夢雞年尚逐斑衣戲俄從白布纏倚閭  
心欲碎投袂涕潺湲更有門前客愁吟滿淚牋

白布纏樹根

疏出晉顧  
愷之傳云

通州太守錢公挽詞

舞鳳來天日憑熊並海門  
盡捐牛犢佩爭咏袴襦恩  
鴈塔名猶在棠郊爰故存  
龍池飛霹靂空記刻舟痕

歷陽通守張文舉挽詞

六雄唐別駕一乘漢題輿  
自笑儒冠誤誰能刺繡如  
彤襜方首路畫翬已隨車  
恨望城南陌哀歌淚滿車

通守李同年挽詞

桂籍聯榮四十年萍漂南北兩茫然  
寒暄初接無淹晷

生死俄分有逝川黃紙尚傳批鳳詔青箱空掩絕韋編  
諸郎頭角皆翁似試看煎膠為續弦

濠州李公挽詞 二首

循吏功名兩漢中平生風義最雍容魚游濠上方云樂  
鵬在承塵忽吉凶掛劔自知吾已許脫驂不為涕無從  
百年窮達都歸盡淮水空圍墓上松

禮數最優徐孺子風流不減謝宣城那知此別成千古  
未信斯言隔几京落日松楸陰隧道西風簫鼓送韶旌

善人報施今如此隴水長寒鳴咽聲

天台太守端明胡公挽詞 三首

孫仲益

天上文昌省人中翰墨仙尚書心似水學士筆如椽視  
草金蓮夜哦詩錦瑟年玉樓方斷手又著紫鸞鞭

又

遮門皓首啼行路涕爭揮不見斑衣好空隨畫翥歸蘭  
芽方獨秀華萼尚交輝試看遼東鶴千年有令威

又

貧病見交情殷勤問死生倒衣迎五馬空巷看雙旌聚  
泛杯中月分班地上荆悲吟追往事感咽氣崢嶸

平江太守侍郎王公挽詞 三首

燕領封侯相鷹揚國士風金貂七葉貴鼓角十州雄按  
節星輅動埋輪虎穴空誰令一臂斷已失大槐宮

又

東吏重足立無家寄一錐道旁烏攫肉舍下犬生甍望  
絕重臨日哀吟去後思吳兒奉嘗我歌此送迎詩

又

通德門中見長安道上逢  
虛名慙薦鶚喜色看乘龍  
流落湘江魄崎嶇楚市春  
相看親眼舊獨有後凋風

致政中奉胡公挽詞

釣石駸駸上綠苔  
起彈長缺詠歸哉  
此翁矍鑠丹心在  
老子婆娑兩鬢催  
一夜劍津龍化後  
千年遼海鶴歸來  
忽忽鼓吹城南路  
往和松風萬壑哀

致政運使直閣朱公挽詞

三首

握節來金馬飛芻上木牛能令天粟雨故作地錢流望  
實傾三館賢勞閱百州寥寥千古恨零落掩山丘

又

蕭散烏藤杖風流白接離分茵前席滿載酒後車隨食  
鼎羅千指歌鐘擁十眉淒涼今夜月空照習家池

又

老脫尚方烏門懸刺史車真成去竹馬直欲換金魚歲  
事千頭橘生涯萬卷書流芳知未艾蘭玉滿堦除

致政左司王公挽詞 三首

東海懷疏傳西州憶謝公  
劍飛衝夜斗桂折臥秋風  
塵暗芸堂冷香凝粉署空  
潺潺千斛淚忍看一旌紅

又

解組天門上揮金里舍旁  
漸欣雙鬢滿仍見一瞳方  
舊說山中相今為地下郎  
流芳知有在鸞鵠正高翔

又

憶昨聯飛蓋初筵點後塵  
那知炊未熟已與迹俱陳  
契

濶成千古悲吟待百身重臨更愁絕感塞鼻中辛

致政魯奉議挽詞 二首

汪彥章

澤國今耆老於今見典刑居鄉乘款段生子得寧馨綵服供春酌銀章慰暮齡誰知雲霧裏忽失少微星

又

詔綉從君賜經龕與佛同早霑三釜祿幾作百年翁閱世松成蓋傳家桂滿叢素車千緡送榮絕九原中

胡原仲挽詞 三首

朱元晦

夫子生名世窮居歲幾年聖門雖力造美質自天全樂  
道初辭幣憂時晚獻篇行藏今已矣心迹故超然

又

澹泊志懷久渾淪玩意深簞瓢無改樂山水自知音冊  
府遺編在丘原宰樹陰門人封馬鬣寒日共沾襟

又

先友多淪謝唯公尚典刑向來深繾綣猶足慰飄零喬  
木摧霜幹長空沒曉星傷心遽如許孤露轉玲玕

李先生挽詞

三首

朱元晦

河洛傳心後，毫釐復易差。淫詞方眩俗，夫子獨名家。本  
本初無二，存存自不邪。誰知經濟業，零落舊烟霞。

又

聞道無餘事，窮居不計年。簞瓢渾漫與，風月自悠然。洒  
落濂溪句，從容洛社篇。平生行樂地，今日但新阡。

又

岐路方南北，師門數似高。一言資善誘，十載笑徒勞。斬

板今來此懷經痛所遭有疑無與析渾淚首頻搔

羅宗約挽詞二首

朱元晦

江閣論心地重來感慨多故人今已矣此道竟如何但  
使窮新得終當訂舊訛語言雖永隔吾欲問滄波

又

行義追前輩孤風凜一生子平昏嫁了元亮去留輕陪  
萬無歸棹嚴楊有舊盟空令同社客生死痛交情

張大資夫人挽詞

孫仲益

金史四庫全書  
卷一百四  
早歲乘龍見伯鸞，賜衣霞爛出齊官。自從東閣郎君貴，  
只作西池阿母看。紫玉簫吹丹鳳去，青萍劍合兩蛟蟠。  
素車白馬城南去，愁見春風桂影團。

永嘉郡夫人挽詞二首

孫仲益

脂田開石竅，綸閣演金葩。綵服聯三組，褕衣米六珈。行  
惟九節杖，坐駕五雲車。便作堂堂去，瑤臺有故家。

又

蔽芾斗城春，平反迹未陳。神馳一丹旆，淚濕兩朱輪。故

物悲萱草哀吟念棘薪空傳青簡上千載望光塵

魯國太夫人文氏挽詞

三首

孫仲益

席罷千齡盛疏榮一品尊魏公丞相婦潞國太師孫連  
騎鳴珂里交柯擁戟門平生種玉手盡室滿瑤琨

又

移孝繫慈母遺忠有世臣挺身安國步抗節犯戎塵錫  
壤開東魯持樞拱北辰寧須待彤筆詔墨在絲綸

又

鼎鍊羞嘉饗溪毛薦德馨來符虺蛇夢去躡鳳凰翎盛  
事垂千載華年閱九齡淒涼便塵迹柏壘自青青

信安郡夫人挽詞

二首

孫仲益

蟬聯女公子湯沐郡夫人籍著金閨密綸袞袞宇新千  
葩朝闈苑雙劍化平津唧唧虫吟夜空梁落暗塵

又

夫擁侍臣橐兒乘刺史輅澗頻供采采風棘盛天天尚  
舞萊斑戲空流楚挽招魑頭引丹旒千古閔山椒

建國劉夫人挽詞 二首

葛謙白

爨彼閨房秀魚軒移大家鳩巢奠蘋藻翟茀絢笄珈覺  
海聊依笈言荃謝算沙平生功用在無疾問毘耶

又

四德推賢範流芳在管彤植蘭門戶秀嚼蠟世緣空荷  
橐夫官重萱堂母道宗相孫仍相婦寂寞閔幽容

吳國夫人挽詞 二首

汪彥章

優恩不與外庭同詔墨親頒出九重鍾鼎承家能兩大

詩書教子得三從葭莩密接椒房慶  
脂澤頻增石窳封  
千里歸來鳴鶴野湘江正繞墓前松

憶昨容衣味祔姑哀聲反哺白頭烏  
佳城欲見千年日  
旅殯先求五父衢汲汲素冠蒙霧雨  
翩翩丹旆歷江湖  
竟成窀穸干戈後以事哀榮女所無

舒御史太夫人挽詞

陳無己

回合江山秀佳城去域中珮環無曉日  
蘋藻自春風  
斷髮人何在捐金事已空  
遂移男子孝更作直臣忠

靖安縣君挽詞

汪彥章

五世傳家德有輝  
更嬪蕭史慕靈妃  
平生未足魚軒樂  
故里空傷羽翼歸  
雌劍忽先收夜氣  
寸莖猶欲報春暉  
自慙不就磨笄志  
尚在徒能淚滿衣

唐令人挽詞

二首

汪彥章

小隱嚴陵下  
當年得孟光  
里師為婦順  
子慶事親長  
洲橘應還熟  
庭萱遂不芳  
他年冠蓋會  
來看伏牛岡

又

有子皆通籍迎扶出萬山色難三釜外眉壽百年間帝  
渥書泥紫兒嬉服綵斑空成潘岳賦無復板輿還

王令人蔡氏挽詞

孫仲益

殿極中台應淮流奕世祥佳兒王武子名父蔡中郎傳  
業青壇在談經絳帳張懸知黑頭貴已佇白眉長蘋老  
那能采萱留祗自芳誰當授彤筆端為刻青琅

吳令人挽詞

二首

孫仲益

誰識東床卧相隨廡下春懸知三復可不恨五憶從玉

冠螭頭立芝塗玳瑁封生兒荀淑似頭角盡羣龍

又

汧汧水東注冉冉日西頽側手留難住揮戈挽莫回鏡  
分天上月劍逸地中雷寂歷空林夜悲蟲亦造哀

樂壽縣君呂氏挽詞 二首

黃魯直

歸裝衣楚楚家世印纍纍來作箕帚婦不忘蘋藻詩居  
然成萬古何翅謁三醫騎省還秋直霜侵鬢脚衰

又

剪髻賓筵盛，齊眉婦禮閑。謂宜偕白髮，忽作去青山。  
大夢驚蝴蝶，何時識珮環。哀歌行欲絕，丹旆兩斑斑。

自作挽詞

秦少游

嬰釁徒荒域，茹哀與世辭。官來錄我素，吏來驗我屍。  
藤束大皮棺，藁塋路旁陂。孤魂不敢歸，惴惴滯猶滋。  
家鄉在萬里，妻子天一涯。弱孤未堪事，歸國定何時。  
昔忝柱下史，通籍黃金閨。一朝竒禍發，飄流至於斯。  
脩塗繚山海，未免從閻維。荼毒復荼毒，彼蒼焉得知。  
秋晚漲江急。

鳥獸鳴聲悲殯宮坐蒼蘚紙錢掛枯枝濛濛寒雨零慘  
澹陰風吹無人致薄奠誰與販黃緇更無挽歌者但有  
挽歌詞

天淵師詩

王介甫

寄托荒山鬼與鄰一生黃卷不離身百年新盡隨緣去  
莫學緇郎更誤人

哭慈濟大師詩

投老惟公最故人相尋長恨隔城闈百年俯仰隨新盡

畫手空傳淨戒身

五百家播芳大全文粹卷一百四